

# Cagamas terbit CCP tiga bulan RM300 juta

**KUALA LUMPUR:** Perbadanan gadai janji nasional, Cagamas Bhd, mengumumkan terbitan Kertas Komersial Konvensional (CCP) bernilai RM300 juta dengan hasilnya akan digunakan bagi membiayai pembelian pajakan daripada sistem kewangan.

Dalam satu kenyataan semalam, Presiden dan Ketua Pegawai Eksekutifnya, Datuk Chung Chee Leong berkata CCP itu juga merupakan terbitan ke-13 syarikat itu yang berjumlah RM8 bilion setakat tahun ini.

“Dianggarkan 28 peratus daripada terbitan syarikat ini berasal daripada Program CPP, Konvensional dan Program Kertas Komersial Islam mata wang tempatan RM20 bilion,” katanya.

Chung berkata CCP itu diterbitkan menerusi penempatan persendirian dan berharga kompetitif pada tebaran mendatar berbanding kadar asas Kadar Tawaran Antara Bank Kuala Lumpur

(LIBOR) tiga bulan.

“Ini turut mewakili tebaran 41 mata asas melebihi Bil Perbendaharaan Malaysia,” katanya.

Menurut Chung, Cagamas juga terus menawarkan instumen pelaburan jangka pendek, berkualiti setiap bulan sejak Februari 2018 dalam pasaran domestik yang berperanan sebagai pilihan pelaburan alternatif untuk pelabur ringgit.

“Kami akan terus meninjau usaha terbitan nota jangka pendek berikutnya permintaan terhadapnya terus ada,” katanya.

Cagamas berkata kertas-kertas berkenaan yang akan ditebus apabila mencapai tempoh matang, adalah obligasi tidak dijamin syarikat itu dan pada kedudukan setara dalam kalangannya serta obligasi lain seumpamanya.

Sekuriti itu akan disenarai dan diniagakan di bawah Sistem Urus Niaga Sekuriti Tanpa Skrip. — Bernama